



JOSEBA OLALDE

Laneko osasunaren alde Gasteizen. Laneko Segurtasunaren eta Osasunaren Nazioarteko Eguna dela eta, elkarretaratzea egin zuten CCOO, UGT eta LSBk Arabako Enpresarien Elkartearen aitzinean.



JOSU ETXEBARRIOSTE

Lan istripuen triskantza salatu. CCOOko gazteek harategi bat irudikatu zuten atzo Confebasken aurrean lan istripuak salatzen, harakina enpresarietara parekatuz.



PABLO S. QUIZA

ABLEak itxeko mugimendua Donostian. Atzo aurkeztu zen Donostiako ABLEak Ixteko Mugimendua. Gipuzkoako hiriburuan dauden 30 ABLE itxeko asmoa dute, «ekintza baketsu eta alaiekin».

Baserritarrentzako laguntzak desbidera litezkeela dio EHNEk

Esparru dekretua negoziatzeko eskatu dio Jaurlaritzari

Joseba Aizarta / Bilbo

Eusko Jaurlaritzak 2000-2006. urteetan nekazaritza laguntzeko prestatzen ari den dekretua gaitzetsi egin du EHNE sindikatuak. Alorreko ordezkarien ekarpenik ez duen dekretu horren bidez, baserritar profesional ez direnek laguntzak jaso ahal izango dituztela salatu du sindikatuak.

GASTEIZEK onartuko duen esparru dekretuak 61.000 milioi pezetaren diru laguntzak jasotzen ditu, erdiak Europako Batasunak emandakoak, eta beste erdiak Jaurlaritzak berak eta aldundiek ipini beharrekoak, aldundiak izango baitira laguntza horiek banatzeko arduradunak.

EHNEko idazkari Maite Aristegik azaldu duenez, dekretuak ez du inon adierazten laguntzak jasotzeko nekazari eta abeltzainek profesionalak izan behar dutenik. Ondorioz, baserrian lanean jarduten ez duten lur jabeek, esate baterako, diru

laguntza horiek jaso litzakete inolako arazorik gabe, nahiz eta nekazaritzarako edo abeltzaintzarako ez erabili.

Bestalde, dekretuak finkatutako diru laguntzen bidez, «nekazaritza produktibista eta intentsiboaren» erdia bultzatzen da, «Euskal Herrian etorkizunik ez daukana», Aristegiren hitzetan.

Dekretuak ez omen du laborari gazteen instalakuntza bultzatzeko neurri eraginkorrik jasotzen (61.000 milioitik 100 milioi besterik ez), hori izanik baserriaren arazo nagusietako bat. Izan ere, EAEn 8.500 familia bizi dira baserritik, azken hamar-

kadan enpleguaren %36,5 galdu ostean.

Azkenik, nekazaritzako lurretan basoak landatzeko atea zabaltzen du dekretuak, horretarako 8.000 milioiren laguntzak zuzenduko baitira. Landaketa horietarako diru laguntzak inbertsioen %50etik %100era bitartekoak izan litezke, dekretuaren arabera.

EHNEk Iñaki Gerenabarrena sailburuarekin negoziatzeko eskatu du, dekretuaren nondik norakoak aldatzeko, eta mobilizazioak zabaltzeko prest agertu da, bere eskakizunak aintzat hartu ezean.

Gasteizko Gobernuaren erantzuna baserriko laguntza politikaren garapena aldundien esku dagoela izan da, ordea. Gauzak horrela, EHNEkoek nekazaritzaren garapenerako diru laguntzak foru erakundeekin negoziatzeko eskatuko dutela iragarri dute.

laburrean

■ Confebaskek «konpromiso gehiago eta buila gutxiago» eskatu die sindikatuari lan istripuen inguruan

CONFEBASK elkarte patronalak «konpromiso gehiago haritzeko eta buila gutxiago egiteko» eskatu die sindikatuari lan istripuen arazoa konpontzeko. Enpresarien ordezkariak ez dute onartzen istripuak direla eta sindikatuak egiten ari diren kritikak. Haien ustez, sindikatuak «euren erantzukizuna besteei egotzen diete», eta «erruak eta akusazioak banatu beharrean, hobe lukete jarrera aktiboagoa hartuko balute dagokien aldetik». Horren erakusgarria sindikatuak Osalaren gestio plana onartu ez izana dela azpimarratu du Confebaskek.

■ Gipuzkoako Aldundiak 4.742 milioi pezeta itzuli ditu kanpainako 16 egunetan

GIPUZKOAKO Foru Aldundiak 4.742 milioi pezeta itzuli dizkie errenta kanpainari 16. eguna arte 30.000 aitortpen mekanizatu aurkeztu dituzten gipuzkoarrei. Ogasun Sailak jakinarazi duenez, herrialdeko 12 bulegoetan 31.818 aitortpen tramitatu dira, iazko epe berean baino %8,33 gehiago. Aitortpen horietatik 1.733 positibo edo ordaintzekoak izan dira, eta Aldundiak 172 milioi jaso ditu haien bidez. Beste guztiak negatibo edo dirua itzultzekoak izan dira. Azken horiekin, batez besteko ordainketa 161.615 pezetakoa izan da.

■ Lan istripuan hildako beharginaren heriotza salatzen lanuzteak eta elkarretaratzea egin dituzte Michelinen

LASARTEKO Michelin pneumatiko lantegiko enpresa batzordeak deituta (ELA, LAB, CCOO eta UGT), txandako bi orduko lanuzteak eta kontzentrazio bat egin zuten atzo enpresako langileek. Xedea euren lankide Jose Maria Corralen heriotza —apirilaren 1ean hil zen, lan istripu larri baten ondorioz— salatzea zuten Michelingo langileek. Enpresa batzordeko ordezkarien arabera, «lan istripuak areagotuz doaz eta langileek pairatzen dute gehienbat egoera hau».

Burtsa


• J.B. ANDUEZA •

Zelulitisa baduzu...

Nahi duzulako da. Kito. Hori bezain zuzena da Bilboko kaleak apaintzen dituen publizitatea. Burtsan ere lotsagabekeria horrek mugitzen dira tekno-akzioak inbertsio-gile zuhurren muturrean: jaitsiera handienak igoera handienekin tartekatuz. Bel-durra badiezu, hor konpon. Bezperako Nasdaq indizearen bultzada baliatuz, %1,14 egin

zuen gora Ibex Merkatu Berriak. Nolanahi, gorabehera gutxiko eguna izan genuen. Gaur EBZk zer erabakiko egongo gara eta, atzo, tekno-akzioez gain (Indra %5,54, TPI %1,54) aldaketa txikiak izan ziren kotizazioetan. Edurnezuri %1,67 igo zen arren, Telefonicareen akzioak 25 euroren azpitik daude oraindik (24,85).

Bilboko 2000 Indizea



Dibisen merkatua

	1 Euro
Pezeta	166,386
Libera	6,55
Dolarra (EEBB)	0,91930
Libra Esterlina	0,58270
100 Yen (Japonia)	0,97850

Beste indizeak

New York (Dow Jones)*	10.985,52 (-%1,25)
Tokio (Nikkei)	18.134,31 (-%0,76)
Madril (IBEX-35)	11.481,50 (+%0,49)
Paris (CAC-40)	6.390,87 (+%1,12)
Londres (FTSE 100)	6.256,50 (-%0,42)
Frankfurt (DAX-XETRA)	7.388,55 (+%1,48)
Milan (Mibtel)	30.787 (-%0,16)

■ **BSCHK** (+%0,7) aurtengo lehen hiruhilekoan iazkoan baino %31,2 gehiago irabazi du, 483 milioi euro. Oso emaitza onak. Mexikon Serfin bankua erosteko hautagaietako bat da (bestea HSBC da).

■ **ZABALBURU** etxe agentzia burtsatik ateratzekoan zen unean egin du Bamik Erostea Eskaintza Publikoa (EEP). EEP horren bidez Zabalbururen %50 eskuratu nahi du gehienez Bamik.